

Representanten **Alexander Fosse Andersen (Sp)** stilte følgjande spørsmål:

Eg viser til handsaming av fylkestingssak 6/21 om oppfølgingstenesta i mars. Fylkestinget fatta mellom anna dette vedtakspunktet:

5. Bakgrunnen for prosjekta Hardanger produksjonsskule og SEFF - Florø er Riksrevisjonen si undersøking i 2012-2015 av om ungdom som har gjort avbrot i vidaregåande opplæring, får god nok oppfylging av oppfølgingstenesta og NAV. Vestland fylkeskommune har allereie samarbeid med NAV på ulike område. Avtale mellom OT og NAV skal etter planen vere ferdig i mars. Fylkestinget ber administrasjonen undersøkje moglegheitene for eit samarbeid med NAV om finansiering av Hardanger produksjonsskule og SEFF - Florø.

Eg lurar på kva som er status for oppfølging av dette vedtakspunktet

Svar frå avdelingsdirektøren:

Avdelingsdirektøren for opplæring og kompetanse har arbeidd saman med NAV om å etablere ein samhandlingsstruktur.

Det er signert overordna avtale mellom NAV og fylkeskommunen. Den overordna avtalen er vedlagt svaret. I tillegg er det utarbeidd og signert to underavtalar. Desse gjeld:

1. Vidaregåande opplæring for vaksne
2. Ungdom utanfor opplæring og arbeid

Avtale om karriererettleiing under arbeid.

I samhandlinga med NAV har avdelingsdirektøren følgd opp vedtakspunkt 5 frå FT sak - 6/21. I møte med avdelingsdirektøren i NAV 20. april 2021 var tilbakemeldingane at NAV sine tiltaksmidlar er lagt ut i dei ulike NAV regionane og at det er dei ulike NAV-regionane som tek stilling til korleis dei nyttar midlane. Under viser ein tabell over NAV sine regionar.

NAV si regioninndeling
Region Bergen
Region Sunnfjord
Region Nordfjord
Region Sogn
Region Sunnhordland
Region Voss/Hardanger
Region Nordhordland
Region Midthordland
Region Vest

I møtet peika NAV på at kommunar kan vere ein naturleg økonomisk samarbeidspart. For Hardanger produksjonsskule, som rekrutterer ungdom frå ein større region, fekk avdelingsdirektøren råd om at det kan vere naturleg at fleire kommunar er medaktørar i ei finansiering. Avdelingsdirektøren har ikkje hatt eigne møter med dei aktuelle NAV-regionane enda.

NAV Fylke og fylkeskommunen har invitert, kvar på si side, lokale og regionale leiarar og andre sentrale fagpersonar til ei halvdagssamling 1. desember 2021. Målet for samlinga er å sikre eit nært og målretta samarbeid mellom NAV og fylkeskommunen for å oppnå intensjonane med avtalane, og avdelingsdirektøren for opplæring og kompetanse vil nytte denne samlinga til å følgje opp FT sak - 6/21.

Fullføringsreformen

Meld. St. 21 (2020-2021) *Fullføringsreformen - med åpne dører til verden og fremtiden* inneheld ulike tiltak for at fleire ungdomar og vaksne skal bestå den vidaregåande opplæringa med studie- eller yrkeskompetanse. I Stortinget si handsaming av Meld. St. 21 (2020-2021),

Fullføringsreformen, var vedtakspunkt nr. 1080, 20. 1. juni 2021: Produksjonsskular. «Stortinget ber regjeringen legge til rette for etablering av flere produksjonsskoler.».

I revidert nasjonalbudsjett for 2021 vart det løyvd 6 mill. kroner til produksjonsskular i Vestland fylkeskommune. jf. Innstilling 600 S (2020-2021). I statsbudsjettet for budsjettåret 2022 er det gjort framlegg om å vidareføre denne løyvinga.

På bakgrunn av dette meiner avdelingsdirektøren at dei statlege løyvingane saman med den fylkeskommunale løyvingane, vil sikre vidare drift av produksjonsskuletilbodet for avdeling Hardanger ut 2022. SEFF - Florø har finansiering ut skuleåret 2021/22.

Avdelingsdirektøren vil halde fram med dialog med NAV om mogleg finansiering av Hardanger produksjonsskule og SEFF-Florø.